

No a haya ningun “obheto medico” rond di Maradona na momento di su morto

(AFP)—Un agente policial cu tabata entre e promenan na e sitio di Diego Maradona su morto cuatro aña pasa, a conta un corte ayera cu e “no a mira ningun obheto medico” den e camber unda e futbolista legendario a ricibi cuido post-operati-

vo na cas.

Agente Lucas Farias a testifica den e huicio di siete profesional di salud acusa di homicidio pa nan supuesto rol den loke fiscalnan a describi como e “teatro di horror” di Maradona su ultimo dianan.

Farias a bisa cu e “no a mira obhetonan medico den e camber. Mi no a mira ningun serum cu mi ta kere mester ta parti di e hospitalisacion na cas,” referiendo na un inyeccion di IV. Farias tabata un di cuatro agente policial pa duna evidencia ayera, un siman despues cu e huicio a habri na San Isidro den e suburbanon norte di Buenos Aires.

“Loke a gara mi atencion tocante Diego Maradona tabata su posicion cara ariba cu un abdomen asina hincha cu ta parce e lo rementa,” segun Farias. “Mi tabata sorprendi pa mira Maradona den e estado ey, mi nunca a pensa mi lo haya mi mes enfrente cu e imagen ey.”

Maradona a fayece dia 25 di november 2020, na edad di 60 aña, mientras e tabata recupe-



rando na cas for di un operacion celebral pa un bloodstolsel, algun decada despues di lucha cu adiccion na cocaina y alcohol. A determina cu el a fayece di fayó di curason y acut edema pulmonar, un condicion unda fluido ta acumula den e pulmonnan.

Riba huicio ta un neurocirujano, un psicologo, un coordinador medico, coordinador di nursing, un dokter y un nurse di anochi acusa di ta criminalmente negligencia den e cuido cu nan a provee

na e futbolista durante su ultimo dianan.

Fiscalnan ta alega cu nan a bandona e futbolista pa su destino pa un “periodo prolonga y doloroso” prome cu su morto. E acusadonan ta enfrente sentencianan di prison di 8 pa 25 aña si nan ser condena di “homicidio cu posible intento”—persiguiendo un curso di accion a pesar di sa cu esaki por causa morto. Ta anticipa casi 120 testigo pa testifica den e huicio anticipa pa core te cu juli.

Queen, Herbie Hancock y Barbara Hannigan ta gana premio di musica Sueco



(AFP)—Banda legendario di rock Queen, musico Mericano di jazz Herbie Hancock y soprano y conductor Canades Barbara Hannigan a gana e Polar Music Prize di Suecia ayera, segun e hurado a bisa.

Queen—forma den 1970 y famoso pa su hitnan incluyendo “Bohemian Rhapsody”, “We Will Rock You” y “Somebody to Love”—a ser honra pa su “melodia distinto y reconocible, cu nigan hende mas por emula,” e fundacion di Polar Music Prize a bisa.

“Mita siglo despues cu nan a haci nan grabacion, e canticanan di Queen ainda ta conoci tur caminda y ta atrae un generacion nobo di amante,” el a bisa. Marie Ledin, e director di gerencia di e Polar Music Prize, a bisa cu e banda tabata “sinonimo cu e fabrica di cultura popular.”

El a gaba Hancock tambe como “un musico legendario cu a logra hopi,” di ken su musica a “pusha e limitenan den jazz, funk, soul y R&B.”

“Nos ta contento di honra su legacia duradero,” el a bisa. E fundacion a bisa cu Hancock su “Cantaloupe Island”, “Watermelon Man” y “Maiden Voyage” a influencia e desaroyo di jazz.

E comite a gaba Hannigan como “un pionero.” El a conduci algun di e top orkestanan na mundo—incluyendo e



London Symphone Orchestra, e Koninklijke Concertgebouworkest di Amsterdam y e Gothenburg Symphony Orchestra—y a interpreta hopi di e componentenan contemporaneo na mundo.

“Semper prepara pa pusha e limitenan, e tin un talento unico pa amplia e horizonte di e scuchador cu e musica cu e ta scoge pa programa, presenta y graba,” e hurado a bisa. E laureadonan lo ricibi nan premio durante un ceremonia na Stockholm dia 27 di mei. Esaki ta inclui un prijs di placa di casi 100,000 dollar cada un.

E Polar Music Prize a ser estableci na aña 1989 pa e difunto Stig Anderson, gerente di superestresanan di pop, Abba, y ta selecta dos of tres laureado tur aña. Aña pasa el a honra leyenda di disco Mericano Nile Rodgers, di ken su hitnan ta inclui “Le Freak” y “Good Times”, como tambe conductor y compositor Finlandes Esa-Pekka Salonen.

Ganadornan den pasado tambe ta inclui Iggy Pop, Paul McCartney, Grandmaster Flash, Metallica, Sting, Bob Dylan, Ravi Shankar, Dizzy Gillespie y e Institutio Nacional Afgano di Musica.



Aruba Bank a patrocina cu orguyo e Festival Un Canto Pa Aruba Su Himno y Bandera 2025



Aruba Bank a patrocina e di 28 edicion di Festival Un Canto Pa Aruba Su Himno y Bandera 2025 - Adulto. Como un sostenedor dedica na e herencia cultural di Aruba, Aruba Bank ta honra di por a patrocina e premio pa e ganador absoluto di evento cultural importante aki.

E festival, cu ta celebra e identidad nacional di Aruba via musica y folklore, a tuma lugar fin di siman na Plaza Libertador G.F. Betico Croes. E evento a enfoka riba e importancia di preserva y promove e musica tradicional di e isla, cu categorianan special pa reconose tanto composicionnan moderno como tambe tradicional (Tipico di Antes).

Como patrocinado di e ganador, Aruba Bank a reafirma su compromiso pa stimula talento local y promove expresion cultural. E banco ta reconose e balor di evento manera esaki cu ta fortalece laso den nos comunidad y ta fomenta un sentido di aprecio profundo pa e herencia cultural di Aruba.

Aruba Bank ta felicita tur participante, finalistanan, y especialmente e ganadornan, cu a demostra talento excepcional y cu a contribui na e celebracion di e identidad nacional di Aruba. Alabes ta gradici nos comunidad cu a atende e evento den gran forma y cu a pasa bishita nos photoboot.

Pabien na e ganadornan absoluto:
Jair Buddy Vesprey y Jean-Paul Lacle.